

Freude in Ehren

Ne G'sang in Ehre,
wer wills verwehre?

Singt's Thierli nit in Hurst und Nast,
der Engel nit im Sterne-Glast?
e freie frohe Muth, e gsund und frölich Blut
goht über Geld und Gut.

Ne Trunk in Ehre,
wer will's verwehre?

Trinkt's Blüemli nit si Morgethau?
Trinkt nit der Vogt si Schöppli au?
Und wer am Werchtig schafft,
dem bringt der Rebesaft
am Suntig neu Chraft.

Ne Chuß in Ehre,
wer will's verwehre?

Chüßt's Blüemli nit si Schwesterli,
und 's Sternli chüßt si Nöchberli?
In Ehre, hani gseit,
und in der Unschuld G'leit,
mit Zucht und Sittsemkeit.

Ne freudig Stündli,
ischs nit e Fündli?

Jez hemmers und iez simmer do;
es chunnt e Zit, würds anderst goh.
Is währts alles churzi Zit,
der Chilchhof isch nit wit.
Wer weiß, wer bal dört lit?

Wenn d'Glocke schalle,
wer hilftis alle?

O gebis Gott e sanfte Tod!
e rüehig Gwisse gebis Gott,
wenn d'Sunn am Himmel lacht,
wenn alles blitzt und chracht,
und in der lezte Nacht!